



Headlines

- जम्मू-कश्मीर विधानसभा दे बजट इजलास कोला पैहले अज्ज सदन दे कम्मकाज सरबन्धी सलाहकार कमेटी दी बैठक लाई गई।
- एल.जी मनोज सिन्हा होरें महात्मा गांधी होरेंगी अज्ज उंदी पुण्यतीथि पर श्रद्धांजलि अर्पित करदे होई आखेआ ऐ जे आलमी सतह पर बने दे यक्को-तक्की आहले हालात दे दरम्यान गांधीवादी विचारधारा असेंगी स्हेई बत्त दस्सदी ऐ।
- कठुआ रेलवे स्टेशन दा नांऽ बदलिए शहीद कैप्टन सुनील कुमार चौधरी कठुआ रेलवे स्टेशन करी दित्ता गेआ ऐ।
- किशतवाड़ जिले च सुरक्षाबलें दा आतंकवाद रोधी अभियान तेज करी दित्ता गेआ, किश इलाकें च मोबाइल इंटरनेट सेवा अद्दे-दुब्बे तौरा पर मुअत्तल रखी गेदी ऐ।
- मौसम विभाग नै 2 फरवरी तोड़ी जम्मू-कश्मीर च दरम्याने दर्जे दी बरखा ते बर्फबारी दी भविष्यवाणी कीती ऐ।



BAC Meet

जम्मू-कश्मीर विधानसभा दे स्पीकर अब्दुल रहीम राथर होरें अज्ज जम्मू आहले सिविल सैक्रेटेरिएट च सदन दे कम्मकाज सरबन्धी सलाहकार कमेटी ते सबनें पार्टिएं दे नुमाइंदें दी बैठक दी सांझी तौर उप्पर प्रधानता कीती। बैठक दरान बक्ख-बक्ख मामलें सने औंदी 2 फरवरी थमां शुरु होआ करदे विधनसभा दे बजट इजलास लेई तैयारिएं पर ध्यान केन्द्रित कीता गेआ। जेहडे सदस्यें इस बैठका च हिस्सा लैता उं'दे च अली मोहम्मद सागर, मुबारक गुल, मोहम्मद युसुफ तारीगामी ते होर दुए विधायक बी शामिल हे। इ'नें विधायकें विधानसभा दे बजट इजलास गी मता नतीजाकुन बनाने बारै अपने मशवरे पेश कीते। सचिव मनोज कुमार पंडित ते विधानसभा दे होर दुए वरिष्ठ अधिकारिएं बी इस बैठका च हिस्सा लैता। इस बैठक गी बजट इजलास दिएं तैयारिएं गी मुक्कदा रूप देने च बड़ा महत्वपूर्ण मन्नेआ जा'रदा ऐ।



LG Babu Tribute

उपराज्यपाल मनोज सिन्हा होरें अज्ज आखेआ जे महात्मा गांधी हुं'दे अहिंसा, सच्चाई ते मनुक्खी गरिमा बारै आदर्श कुल संसारी जक्को-तक्की आले हालात, संघर्शें ते जलवायु चुनौतिएं बश्कार मते प्रासंगिक ना। उपराज्यपाल होरें एहू गल्ल महात्मा गांधी ते गांधीवादी बत्ता पर टुरने आले स्वतंत्रता सेनानिएं गी श्रद्धांजलि दिंदे होई

आकखी। मुबारक मंडी च गांधी ग्लोबल फैमिली आसेआ आयोजित इक कार्जक्रम गी संबोधित करदे होई एल.जी होरें आखेआ जे गांधी सिर्फ अतीत दे नेता नेई हे, सगुआं अज्ज दी दुनिया लेई इक मार्गदर्शक आली किरण ना। अहिंसा, सच्चाई ते आत्मनिर्णय दा उंदा दृष्टिकोण अज्ज बी उन्ना गै प्रासंगिक ऐ जिन्ना भारत दे स्वतंत्रता संग्राम दे दरान हा। इस मौके बोलदे होई एल.जी होरें आखेआ

<><><><><><>

### Martyr's Day Observation

अज्ज शहीदी दिवस दे मौके पर भारत दे स्वतंत्रता संग्राम दरान अपनी जिंद न्यौछावर करने आहलें दे चेत्ते च 2 मिटें दा मौन रखेआ गेआ। मुख्मन्त्री उमर अब्दुल्ला होरें राष्ट्र ते स्वतंत्रता, न्याऽ ते लोकतंत्र दे आदर्श लेई अपनी जिंद जान बारने आले शहीदें गी श्रद्धांजलि दिती। उनें आखेआ जे उंदा सर्वोच्च बलिदान सदा औने आहली पीढियें लेई प्रेरणा दा स्रोत बना रौहगा। उंदा सम्मान च सिविल सचिवालय च बी 2 मिटें दा मौन रखेआ गेआ। मुख्म सचिव हुंदी मौजूदगी च सब्बै प्रशासनिक सचिवें बी इस आयोजन च हिस्सा लैता।

<><><><><><>

### Kathua R S

शहीद कैप्टन सुनील कुमार चौधरी हुंदे सर्वोच्च बलिदान लेई ते उन्दे सम्मान लेई कठुआ रेलवे स्टेशन दा नांऽ बदलियै उन्दे नांऽ पर रखेआ गेआ ऐ। एहू आदेश उपराज्यपाल मनोज सिन्हा हुं'दी मंजूरी दे मगरा सामान्य प्रशासन विभाग आसेआ जारी कीता गेआ ऐ। जिनें 27 जनवरी 2008 गी 27 साल दी उम्र च असम च इक आतंकवादी बरोधी अभियान दरान अपनी शहादत दिती ही। कैप्टन सुनील कुमार चौधरी होरें'गी मरणोपरान्त देसा दा दुआ सभनें थमां बड्डा शांति काल दा वीरता पुरस्कार कीर्ति चक्र कन्नै सम्मानित कीता गेआ हा। आकाशवाणी समाचार कन्नै गल्ल करदे होई उन्दे पिता कर्नल पी.एल चौधरी होरें आखेआ

<><><><><><>

### Anti Terror Ops

सुरक्षाबलें अज्ज किशतवाड़ जिले दे बर्फू कन्नै ढकोए दे चतरू इलाके च चला'रदे आतंकवाद बरोधी अभियान गी तेज करी दिता ऐ तां जे छप्पे दे जेश-ए-मोहम्मद दे त्रऊं आतंकवादिणं दा पता लाया जाई सकै। एहतियात दे तौरा पर सिंहपोरा, चिंगम ते चतरू दे 6 किलोमीटर दी हद च मोबाइल इंटरनेट सेवां, आरजी तौरा पर मुअत्तलरेई ऐ। 18 जरवरी गी शुरू होए दे इस अभियान च भारी बर्फबारी दे बावजूद कई टाकरे होए ना। पेश ऐ इस सरबंधां च रिपोर्ट

इस्सै बश्कार संदिग्ध गतिविधि दी सूह लग्गने दे मगरा पुंछ जिले दे सुरनकोट इलाके च बक्ख तपाशी अभियान चला'रदा ऐ।

<><><><><><>

राष्ट्र दी सेवा दे बरे पूरे होने पर इंडियन चैंबर ऑफ कामर्स नै आई.सी.सी राइजिंग जम्मू एंड कश्मीर 2026 दा कामयाबी कन्नै आयोजन कीता जेडा इक उच्च स्तरीय मतमे स्तरें आहली कांफ्रेंस ही। एहदा मकसद आर्थिक विकास दी परतियै कल्पना करना ते केंद्र शासित प्रदेश दे विकास सरिस्ते गी मजबूत करना हां जम्मू नगर निगम कमिशनर डॉ. देवांश यादव होरें नगर निगम उप नियमें गी समझने पर इक सत्र दी अध्यक्षता कीती ते ईमारत सरबंधी इजाजत बपार सरबंधी लाइसेंस, जोन कन्नै जुडे दे नियम-कायदें, बोर्ड दिशा-निर्देशें आले नियम, डिजिटल गवर्नेंस पैहलें ते बपार करने गी सखल्ला बनाने कन्नै जुडे दे कम्में ते नागरिकें दे मुद्दें गी हल करने बारै संबोधित कीता। किट्ट गी संबोधित करदे होई जे.एम.सी दे कमिशनर होरें आखेआ

<><><><><><>

Samba Creche (Byte)

सांबा दिएं डिप्टी कमिशनर आयूषी सूदन होरें सांबा आहले डीसी दफ्तर परिसर च महिला कर्मचारिएं लेई क्रेच सुविधा दा अज्ज उद्घाटन कीता। एह सुविधा रेड क्रॉस सोसायटी आसेआ विकसित कीती गई ऐ ते एहदा मकसद कम्मकाजी महिलाएं गी कम्म आहलए थहें पर बच्चें दी दिक्खभाल आहला इक सुरक्षित म्हौल उपलब्ध करोआना ऐ। इस पैहलकदमी दे राहें कम्मकाजी महिलाएं गी अपनी पेशेवर ते परोआरिक जिम्मेदारिएं च संतुलन स्थापत करने च मदाद मिलग। क्रेच सुविधा दे उद्घाटन आहले कार्यक्रम च अतिरिक्त डिप्टी कमिशनर, जिला अधिकारी ते रेड क्रॉस दे प्रतिनिधि बी शामिल होए। इस मौके पर आकाशवाणी समाचार कन्नै गल्ल करदे होई सांबा दिएं डिप्टी कमिशनर आयूषी सूदन होरें आखेआ

<><><><><><>

Sorts Football/Cricket League

जमीनी स्तर पर खेड्डें गी होर मजबूत करने दी कोश्ट दे तैहत जम्मू, युवा सेवाएं ते खेड्डें सरबंधी विभाग ते जम्मू-कश्मीर खेड्डु काउंसल आलिएं फुटबाल ते क्रिकेट प्रीमियर लीग दी मेजबानी करने जा'रदी ऐ। आकाशवाणी जम्मू दे संवाददाता दी रिपोर्ट मुजब युवा सेवाएं ते खेड्डें सरबंधी मैहकमा जम्मू-कश्मीर खेड्डु काउंसल कन्नै रलिय एह पैहलकदमी करोआने गी जा'रदा ऐ तां जे मकामी प्रतिभाएं गी इक मंच प्रदान कीता जाई सकें इनें मुकाबलें च फुटबाल दे कुल 41 मैच ते क्रिकेट दे 39 मैच होडन। एह टूर्नामेंट परेड दी सिंथेटिक टर्फ फुटबाल ग्राउंड ते मौलाना आजाद स्टेडियम च आयोजित होडन। मकामी लोकें एहदा सोआगत करदे होई बड़ी मती खुशी जाहिर कीती ऐ। उंदा आखना ऐ .....बाईट.....

<><><><><><>

Weather

मौसम विभाग नै जम्मू-कश्मीर लेई ताजा तरीन जानकारी दिती ऐ। अज्ज किश उच्चि धारें च हल्की बर्फबारी होने दी मेद ऐ। कल थमां पैहली फरवरी तगर केंद्र शासित प्रदेश दे केई हिस्सें च तेज ब्हाऊ दे चलने दे कन्नोकन्नी हल्की थमां दरम्याने दर्जे दी बरखा बरने ते बर्फबारी होने दी मेद ऐ। दो फरवरी दी रातीं ते 3 फरवरी बड्डुलै हल्की बरखा या बर्फबारी होई सकदी ऐ। अधिकारिएं यात्रुएं ते बर्फबारी आले इलाकें दे बसनीकें गी अधिकारिक सलाह मनने दी हिदायत कीती ऐ। मौसम विभाग दे इक अधिकारी नै इस बारै होर जानकारी सांझा करदे होई आखेआ

<><><><><><>